

arquebousiers de la ville conduicts par l'un des sergens de leur compagnie ayant tous l'arquebouse baissée, la mèche esteinte et leurs morrions couverts de cresse noir, devant lesquels le tambour couvert de *même* cresse, et fifre sonnait fort impitoyablement.

Après suyvoient les deux cents Suysse estant en garnison en ladite ville conduicts par leur cappitaine à cheval, et son lieutenant à pied, tous deux vestus de grands manteaux noirs, lesdits Souysse tenant leurs allebardes la poincte contre terre et avoyent aussi leurs tambours battans, et fifres sonnans comme les précédens.

Ceulx-cy estoient suyvis des arquebousiers francois de la garde dudit feu sieur de Mandelot, conduicts par monsieur de la Grange leur cappitaine, et par le capitaine Ferrand son lieutenant. Ledit Ferrand tenant son allebarde couverte de cresse noir la poincte contre terre, et lesdicts arquebousiers ayant comme les autres l'arquebouse baissée, la mesche esteinte et leurs morrions couvers comme les précédens de cresse noir.

Venoient en après les torches tant des nations Allemande, Souysse, Lucquoise, Milanoise, Genenoise, Florentine, que des particuliers en sy grand nombre, qu'il eust esté impossible de les compter, lesquelles estoient suyvies des torches de l'Aulmosne generale, de celles de la ville, et en après de celles de messieurs de la grande église, de celles de monseigneur l'archevesque, de celles du roy qui estoient flambeaux de cire blanche portés par les sergens royaux, et enfin par celles du corps portées par cinquante paouvres hommes vestus aux despens de l'hoirie dudit feu seigneur de robes, chapperon, chausses et solliers neufs.

En après marchoit les gens d'armes et archiers de sa compagnie conduicts par leur mareschal des logis, revestus de leurs hoquetons d'armes et leurs manteaux dessus.

Après eulx venoit la compagnie des penitens, avec leurs crucifix et flambeaux à la manière accoustumée. Ladicte compagnie de penitens estoit suyvie des Mendians, Minimes, Observantins, Augustins, Cordelliers, Carmes et Jacopins, suivis et confusement des églises de Saint-Jehan, Saint-Just, Saint-Pol, Saint-Nizier, et la Plattiere, après lesquels marchoit l'evesque de Damas, suffragant dudit sire archevesque, et les quatre bastonniers desdictes églises.

Venoit après le cheval de paradé tout couvert de velours noir avec une grande croix de satin blanc au travers, mené par les resnes par les escuyers de l'escuyeries dudit sire, habillés de duell.